

PREČIŠĆENI, NEZVANIČNI TEKST
(„Službeni glasnik Bosne i Hercegovine” br. 27/04, 35/05, 49/09.)

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na sjednici Predstavničkog doma, održanoj 23. aprila 2004. godine, i na sjednici Doma naroda, održanoj 4. maja 2004. godine, usvojila je

ZAKON O DRŽAVNOJ AGENCIJI ZA ISTRAGE I ZAŠTITU

I. OPĆE ODREDBE

Članak 1.

Djelokrug propisivanja

(1) Ovim zakonom osniva se Državna agencija za istrage i zaštitu (u daljnjem tekstu: SIPA) i utvrđuje se njena nadležnost i organizacija kao policijskog organa Bosne i Hercegovine (u daljnjem tekstu: BiH).

(2) Na sva ostala pitanja značajna za djelovanje SIPA-e kao policijskog organa, u mjeri u kojoj nisu propisana ovim zakonom, primjenjuje se Zakon o policijskim službenicima BiH, Zakon o Direkciji za koordinaciju policijskih tijela i o agencijama za podršku policijskoj strukturi BiH, Zakon o nezavisnim i nadzornim tijelima policijske strukture BiH i drugi zakoni koje primjenjuje SIPA u svom radu.

(3) Na sva pitanja organizacije i upravljanja te druga pitanja značajna za funkcioniranje SIPA-e kao upravne organizacije, kao što je donošenje Pravilnika o unutrašnjoj organizaciji i drugih propisa, upravni nadzor, odnos između institucija BiH te odnos prema pravnim i fizičkim osobama, u mjeri u kojoj nisu propisana ovim zakonom, primjenjuje se Zakon o ministarstvima i drugim organima uprave BiH, te Zakon o upravi.

Članak 2.

Definicija SIPA-e

(1) SIPA je upravna organizacija u okviru Ministarstva sigurnosti BiH (u daljnjem tekstu: Ministarstvo), s operativnom samostalnošću, osnovana radi obavljanja policijskih poslova, a na čijem je čelu direktor, i koja se financira iz Budžeta institucija Bosne i Hercegovine i međunarodnih obaveza Bosne i Hercegovine.

(2) SIPA djeluje isključivo na profesionalnim osnovama, ne zastupajući, ne štiteći niti podrivajući interese bilo koje političke stranke, registrirane organizacije ili udruženja, bilo kojeg konstitutivnog ili drugog naroda u BiH.

Članak 3.

Nadležnost SIPA-e

(1) Poslovi iz nadležnosti SIPA-e su:

- a) sprečavanje, otkrivanje i istraga krivičnih djela iz nadležnosti Suda Bosne i Hercegovine (u daljnjem tekstu: Sud), a posebno: organiziranog kriminala, terorizma, ratnih zločina, trgovine ljudima i drugih krivičnih djela protiv čovječnosti i vrijednosti zaštićenih međunarodnim pravom, te teškog finansijskog kriminala;
- b) prikupljanje obavještenja i podataka o krivičnim djelima iz tačke a) ovog stava, te praćenje i analiza sigurnosne situacije i pojava koje pogoduju nastanku i razvoju kriminaliteta;
- c) pružanje pomoći Sudu i Tužilaštvu Bosne i Hercegovine (u daljnjem tekstu: Tužilaštvo) u prikupljanju obavještenja, te izvršavanje naloga Suda i Glavnog tužioca BiH (u daljnjem tekstu: Tužilac);
- d) zaštita svjedoka;
- e) provođenje međunarodnih sporazuma o policijskoj suradnji i drugih međunarodnih instrumenata u njenoj nadležnosti;
- f) kriminalistička ekspertiza;
- g) ostali poslovi propisani zakonom i drugim propisom.

(2) SIPA obrađuje podatke i vodi evidencije u skladu sa Zakonom o policijskim službenicima BiH, Zakonom o zaštiti ličnih podataka BiH i drugim propisima BiH.

Članak 4.

Uspostava SIPA-e

(1) Sjedište SIPA-e je u Sarajevu.

(2) SIPA ima najmanje dva regionalna ureda sa sjedištem u Banjoj Luci i Mostaru.

(3) Vijeće ministara BiH (u daljnjem tekstu: Vijeće ministara) može donijeti odluku o uspostavi novih regionalnih ureda.

(4) SIPA ima odjele i jedinice.

(5) Uz odjele i jedinice osnovane ovim zakonom, ostale se organizacijske jedinice unutar ili izvan sjedišta SIPA-e mogu uspostaviti Pravilnikom o unutrašnjoj organizaciji Državne agencije za istrage i zaštitu (u daljnjem tekstu: Pravilnik).

Članak 5.

Radni odnosi u SIPA-i

(1) Zaposleni u SIPA-i su policijski službenici, državni službenici, zaposlenici i ostali zaposleni u skladu sa Pravilnikom.

(2) Policijski službenici su ovlaštene službene osobe na čije se radne odnose primjenjuje Zakon o policijskim službenicima BiH.

(3) Na radne odnose državnih službenika primjenjuje se Zakon o državnoj službi u institucijama BiH, a na radne odnose zaposlenika Zakon o radu u institucijama BiH.

(4) Radna mjesta na kojima rade policijski službenici te radna mjesta državnih službenika, namještenika i ostalih zaposlenika uređuju se Pravilnikom.

Članak 6.

Policijska ovlaštenja

Policijski službenici zaposleni u SIPA-i primjenjuju policijska ovlaštenja u skladu sa Zakonom o policijskim službenicima BiH i postupaju kao ovlaštene službene osobe u skladu sa zakonima o krivičnom postupku u BiH (u daljnjem tekstu: zakon o krivičnom postupku).

II. ORGANIZACIJA

1. Upravljanje

Članak 7.

Rukovođenje, imenovanje i razrješenje

- (1) SIPA-om rukovodi direktor SIPA-e (u daljnjem tekstu: direktor).
- (2) Direktor ima jednog zamjenika i pomoćnike direktora, koji za svoj rad odgovaraju direktoru.
- (3) Direktora i zamjenika direktora imenuje Vijeće ministara na prijedlog ministra sigurnosti BiH (u daljnjem tekstu: Ministar), sa liste kandidata koju dostavi Nezavisni odbor, na mandat od četiri godine, uz mogućnost reimenovanja u drugom narednom mandatu.
- (4) Vijeće ministara razrješava direktora i zamjenika direktora prema uslovima i procedurama koje provodi Nezavisni odbor.
- (5) Direktor i zamjenik direktora mogu biti razriješeni dužnosti prije isteka mandata:
 - a) na lični zahtjev;
 - b) ako mu je konačnom odlukom izrečena disciplinska mjera zbog učinjene teže povrede radne dužnosti;
 - c) ako je osuđen za krivično djelo, osim za krivično djelo iz oblasti sigurnosti saobraćaja;
 - d) ako se utvrdi da je aktivni član političke stranke;
 - e) ako se na osnovu mišljenja nadležne zdravstvene ustanove utvrdi da je trajno spriječen da obavlja dužnost.
- (6) Direktor i zamjenik direktora ne mogu biti iz istog konstitutivnog naroda.

Članak 8.

Dužnosti i odgovornosti direktora

- (1) Direktor:
 - a) predstavlja SIPA-u;
 - b) izrađuje godišnji plan rada prema smjernicama predsjedavajućeg Vijeća ministara te godišnji budžet SIPA-e i predlaže ih ministru, koji ih prosljeđuje Vijeću ministara;
 - c) rukovodi i usmjerava obavljanje poslova iz nadležnosti SIPA-e;
 - d) osigurava pravilno izvršavanje smjernica i naloga tužioca o radnjama policijskih službenika u vezi s krivičnim postupkom;
 - e) osigurava suradnju s organima za provođenje zakona te ostalim odgovarajućim tijelima u BiH;
 - f) osigurava suradnju s organima za provođenje zakona i ostalim nadležnim službama stranih država, kao i provođenje ostalih međunarodnih sporazuma o policijskoj suradnji i drugih međunarodnih instrumenata iz nadležnosti SIPA-e.
- (2) Uz dužnosti i odgovornosti iz stava (1) ovog člana, direktor obavlja i druge poslove, kao što su:
 - a) donošenje Pravilnika uz suglasnost Vijeća ministara, kao i drugih propisa predviđenih zakonom, koji su potrebni radi obavljanja poslova iz nadležnosti SIPA-e;
 - b) raspoređivanje dužnosti pomoćnicima direktora, načelnicima i ostalim rukovodiocima osnovnih organizacionih jedinica u skladu sa zakonom, Pravilnikom i drugim propisima;
 - c) donošenje odluka o zapošljavanju, raspoređivanju i prestanku rada zaposlenih u SIPA-i u skladu sa odgovarajućim zakonima i propisima;
 - d) provođenje aktivnosti za nabavku oružja i municije u suradnji sa Agencijom za policijsku podršku, a uz suglasnost ministra;
 - e) provođenje aktivnosti u vezi sa programima obuke i stručnog usavršavanja zaposlenih u SIPA-i, a shodno Zakonu o Direkciji za koordinaciju policijskih tijela i o agencijama za podršku policijskoj strukturi BiH i Zakonu o policijskim službenicima BiH;
 - f) podnošenje godišnjeg izvještaja o radu i situaciji na područjima iz nadležnosti SIPA-e ministru, koji ga prosljeđuje Vijeću ministara te posebnih izvještaja po potrebi ili na zahtjev ministra;
 - g) podnošenje izvještaja Parlamentarnoj skupštini BiH, Vijeću ministara i Predsjedništvu BiH, na njihov zahtjev;
 - h) obavljanje drugih dužnosti propisanih zakonom i drugim propisima.
- (3) Direktor je odgovoran za zakonitost rada SIPA-e i za zakonito trošenje sredstava dodijeljenih SIPA-i iz Budžeta institucija Bosne i Hercegovine i međunarodnih obaveza Bosne i Hercegovine.
- (4) Direktor je za svoj rad i rad SIPA-e, te za situaciju na područjima iz nadležnosti SIPA-e odgovoran ministru i Vijeću ministara.

Članak 9.

Zamjenik direktora, pomoćnici direktora i načelnici

- (1) Zamjenik direktora zamjenjuje direktora za vrijeme njegovog odsustva, ispunjava pojedine dužnosti koje mu prenese direktor te obavlja zaduženja koja mu, prema potrebi, dodjeljuje direktor u cilju efikasnog i pravilnog obavljanja poslova SIPA-e.
- (2) Pomoćnici direktora, odnosno načelnici rukovode odjelom, odnosno jedinicom na čijem su čelu, a za svoj rad i rad odjela, odnosno jedinice odgovaraju direktoru.
- (3) Pomoćnici direktora i ostali rukovodeći službenici osnovnih organizacionih jedinica se postavljaju, imenuju, prestaje im radni odnos u skladu sa Zakonom o policijskim službenicima BiH i Zakonom o državnoj službi u institucijama BiH.

(4) Po isteku mandata pomoćnika direktora, policijski službenik koji je bio na takvom položaju raspoređuje se na položaj za koji je potreban čin glavnog inspektora

Članak 10.

Spriječenost direktora

(1) Ako direktor nije u mogućnosti ispunjavati svoje dužnosti i odgovornosti, ispunjava ih zamjenik direktora, sve dok ih direktor ponovo ne bude u mogućnosti preuzeti ili do imenovanja novog direktora.

(2) Ako direktor ne može ponovo preuzeti svoje dužnosti i odgovornosti, provodi se postupak u skladu sa odredbama člana 7. stav (3) ovog zakona.

2. Struktura

Članak 11.

Sastav SIPA-e

SIPA se sastoji od sljedećih odjela i jedinica:

- a) Kriminalističko-istražni odjel;
- b) Financijsko-obavještajni odjel;
- c) Odjel za zaštitu svjedoka;
- d) Jedinica za specijalnu podršku;
- e) Odjel za unutrašnju kontrolu;
- f) niže organizacijske jedinice uspostavljene Pravilnikom.

Članak 12.

Poslovi i zadaci Kriminalističko-istražnog odjela

Kriminalističko-istražni odjel:

- a) radi na otkrivanju i istrazi krivičnih djela iz nadležnosti Suda, pronalaženju i hapšenju počinitelaca tih krivičnih djela i njihovom dovođenju Tužiocu, pod nadzorom, smjernicama i nalogima Tužioca u skladu sa zakonom o krivičnom postupku;
- b) radi na sprečavanju krivičnih djela;
- c) pruža operativnu pomoć Financijsko-obavještajnom odjelu;
- d) prikuplja obavještenja i podatke o krivičnim djelima, prati i analizira sigurnosnu situaciju i pojave koje pogoduju nastanku i razvoju kriminaliteta;
- e) organizira i obavlja kriminalističko-stručne poslove.

Članak 13.

Poslovi i zadaci Financijsko-obavještajnog odjela

Financijsko-obavještajni odjel:

- a) prima, prikuplja, evidentira, analizira, istražuje i prosljeđuje Tužiocu informacije, podatke i dokumentaciju primljenu u skladu sa zakonom i drugim propisima BiH o sprečavanju pranja novca i financiranja terorističkih aktivnosti;
- b) ostvaruje međunarodnu suradnju na polju sprečavanja i istrage pranja novca i financiranja terorističkih aktivnosti;
- c) pruža Tužiocu stručnu podršku iz područja financija.

Članak 14.

Zadaci Odjela za zaštitu ličnosti i objekata Brisano

Članak 15.

Zaštićene osobe Brisano

Članak 16.

Zaštićeni objekti i druga zaštićena imovina Brisano

Članak 17.

Poslovi i zadaci Odjela za zaštitu svjedoka

Odjel za zaštitu svjedoka provodi zaštitu svjedoka u skladu sa zakonima i drugim propisima BiH o zaštiti svjedoka.

Članak 18.

Poslovi i zadaci Jedinice za specijalnu zaštitu

(1) Jedinica za specijalnu podršku pruža pomoć drugim odjelima osiguravajući dodatnu policijsku taktiku, opremu i osoblje, kada su potrebne pojačane mjere sigurnosti.

(2) JSP obavlja najzahtjevnije i najsloženije taktičke i operativno-tehničke policijske radnje, primjenjujući policijska ovlaštenja u visokorizičnim situacijama kada su neophodne posebne vještine, obučenosť i oprema.

(3) Upotrebu JSP-a odobrava direktor.

Članak 19.

Poslovi i zadaci Odjela za unutrašnju kontrolu

Odjel za unutrašnju kontrolu nadležan je za:

- a) interne istrage po predstavkama o nepriličnom ponašanju zaposlenika SIPA-e;
- b) istrage upotrebe sile, naročito vatrenog oružja, korupcije i zloupotrebe ovlaštenja od strane policijskih službenika u skladu sa Zakonom o policijskim službenicima BiH;
- c) interne kontrole postupaka unutar odjela, kako bi se osiguralo propisno postupanje po zakonu, pravilnicima, policijskim priručnicima i pisanim naredbama;
- d) razvoj stručnih standarda i politike postupanja.

Članak 20.

Dodatni poslovi i zadaci organizacionih jedinica

Dodatni poslovi i zadaci organizacionih jedinica mogu se detaljnije urediti Pravilnikom u skladu s ovlaštenjima propisanim Zakonom.

III. SLUŽBENA SARADNJA

Članak 21.

Pružanje pomoći

(1) Organi uprave i druga tijela, službe i druge institucije u BiH, entitetska i kantonalna ministarstva unutrašnjih poslova, carinske i poreske vlasti, finansijska policija, tijela za međunarodnu operativnu policijsku suradnju, nadležna tijela Brčko Distrikta BiH i druga odgovarajuća tijela dužna su surađivati sa SIPA-om i na njen zahtjev pružiti pomoć SIPA-i u obavljanju poslova iz njene nadležnosti, te koordinirati djelatnosti iz svoje nadležnosti, u skladu sa zakonom i drugim propisima o zaštiti izvora, metoda i ostalih nejavnih informacija.

(2) SIPA je dužna surađivati i pružiti pomoć tijelima iz stava (1) ovog člana na njihov zahtjev.

(3) Način pružanja pomoći i sva ostala pitanja vezana uz pružanje pomoći i suradnju iz stava (1) i (2) ovog člana uređuju se međusobnim sporazumom ili drugim pravnim aktom u mjeri u kojoj nisu utvrđena zakonom.

Članak 22.

Dužnost obavještanja nadležnoga tijela

(1) SIPA je dužna obavijestiti tijela iz članka 21. stavka (1) ovog zakona o saznanjima prikupljenim u obavljanju svojih dužnosti, a u vezi s pripremanjem ili činjenjem krivičnog djela koje je u nadležnosti tog tijela, kao i o mjerama i radnjama poduzetima u cilju sprečavanja činjenja ili pronalaženja i hapšenja počinitelaca takvih krivičnih djela.

(2) Tijela iz članka 21. stavka (1) ovog zakona dužna su obavijestiti SIPA-u o saznanjima prikupljenim u obavljanju svojih dužnosti, a u vezi s pripremanjem ili činjenjem krivičnog djela iz nadležnosti SIPA-e, kao i o mjerama i radnjama poduzetim u cilju sprečavanja činjenja ili pronalaženja i hapšenja počinitelaca takvih krivičnih djela.

Članak 23.

Međunarodna suradnja

(1) SIPA može surađivati sa stranim organima za provođenje zakona i drugim stranim odgovarajućim tijelima, u cilju obavljanja poslova utvrđenih u članku 3. Ovog zakona. Suradnja može uključivati razmjenu podataka i zajedničko obavljanje radnji iz nadležnosti SIPA-e.

(2) SIPA može dostaviti stranim organima za provođenje zakona i drugim stranim odgovarajućim tijelima podatke o državljanima BiH, ukoliko primi obavještenje da državljanin predstavlja opasnost za sigurnost BiH, državu u kojoj se nalazi ili širu opasnost za regionalnu ili globalnu sigurnost.

(3) Suradnja sa stranim organima za provođenje zakona u krivičnim stvarima obavlja se preko nadležnih organa i institucija BiH.

(4) Izuzetno od odredbi stavka (2) ovoga člana, SIPA neće dostaviti podatke o državljanima BiH ukoliko nema razumno osiguranje da će primalac osigurati isti stepen zaštite podataka koji se osigurava u BiH.

(5) Ukoliko se podaci odnose na krivični postupak koji se vodi u BiH, razmjena podataka iz ovoga člana vrši se u skladu sa zakonom o krivičnom postupku, Zakonom o zaštiti osobnih podataka i Zakonom o zaštiti tajnih podataka.

IV. PRIJELAZNE I ZAVRŠNE ODREDBE

Članak 24.

Prestanak važenja prethodnih zakona

(1) Danom stupanja na snagu ovog zakona prestaje važiti Zakon o Agenciji za informacije i zaštitu Bosne i Hercegovine ("Službeni glasnik Bosne i Hercegovine", broj 15/02).

(2) Zaposlenici, imovina, uključujući i obaveze, te sredstva rada Agencije za informacije i zaštitu Bosne i Hercegovine postaju zaposlenici, imovina i sredstva rada Državne agencije za istrage i zaštitu (SIPA-e).

Članak 24. a.

Prijelazni period

(1) U prijelaznom periodu, organiziranje i provođenje fizičke i tehničke zaštite lica i objekata organa BiH i diplomatsko-konzularnih organa koji se posebno štite u skladu sa odgovarajućim zakonima, međunarodnim obavezama i drugim propisima koje donosi Vijeće ministara, obavljat će SIPA do ostvarivanja uslova da ih preuzme Direkcija za koordinaciju policijskih tijela BiH, a najkasnije u roku od 90 dana od početka rada Direkcije.

(2) Zaštićena lica, u smislu ovog zakona su:

- a) članovi Predsjedništva BiH;
- b) predsjedavajući Vijeća ministara;
- c) ministri u Vijeću ministara;
- d) predsjedavajući Doma naroda Parlamentarne skupštine BiH;
- e) predsjedavajući Predstavničkog doma Parlamentarne skupštine BiH;
- f) predsjednik Suda BiH;
- g) glavni tužilac BiH;

h) strani zvaničnici u posjeti BiH i druga lica po odluci Vijeća ministara.

(3) Kada to situacija nalaže, po odluci direktora, a na osnovu stručne procjene SIPA-e, SIPA može pružiti zaštitu: ostalim članovima Parlamentarne skupštine BiH, ostalim sudijama Suda BiH, zamjeniku tužioca i ostalim tužiocima Tužilaštva BiH, licima zaposlenim u institucijama BiH, u diplomatskim i konzularnim predstavništvima BiH, te licima u posjeti BiH.

(4) Zaštićeni objekti i druga imovina u smislu ovog zakona su objekti i druga imovina kojoj je BiH obavezna pružiti zaštitu prema međunarodnom pravu i zakonu, ili po odluci Vijeća ministara.

Članak 25.

Primjenjivi propisi

(1) Pravilnik će se donijeti u roku od 60 dana od dana stupanja na snagu ovog zakona. ([Stupanja na snagu Zakona o izmjenama i dopunama Zakona o Državnoj agenciji za istrage i zaštitu osmog dana od dana objavljivanja „Službenog glasnika BiH“ broj: 49/09](#))

(2) Do usvajanja odgovarajućih propisa, SIPA primjenjuje propise donesene prema Zakonu o Državnoj agenciji za istrage i zaštitu („Službeni glasnik BiH, broj: 27/04 i 35/05), u mjeri u kojoj ti propisi nisu u suprotnosti s ovim zakonom i Zakonom o policijskim službenicima BiH.

Članak 26.

Imenovanja

(1) Postupak imenovanja direktora, zamjenika direktora, pomoćnika direktora za Kriminalističko istražni odjel i pomoćnika direktora za Odjel za unutrašnju kontrolu započet će se po proteku roka od 90 dana od dana stupanja na snagu ovog zakona, a okončat će se najkasnije u roku do 8 mjeseci od dana stupanja na snagu ovog zakona.

(2) Imenovanja iz stava (1) ovog člana stupit će na snagu prvog dana po proteku roka od 6 mjeseci od dana stupanja na snagu ovog zakona, u kojem roku direktor i zamjenici direktora imenovani prema zakonu iz člana 24. stava (1) ovoga zakona obavljaju poslove i nadležnosti po ovom zakonu.

Članak 26. a.

Mandat imenovanih lica

(1) Mandat lica koja na dan stupanja na snagu ovog zakona obavljaju dužnost direktora i zamjenika direktora ne može trajati duže od perioda koji je propisan članom 7. stav (3) ovog zakona.

(2) Mandat lica koja na dan stupanja na snagu ovog zakona obavljaju dužnost pomoćnika direktora za Kriminalističko-istražni odjel i pomoćnika direktora za Odjel za unutrašnju kontrolu će trajati do isteka mandata na koji su imenovani.

(3) Trajanje mandata licima iz st. (1) i (2) ovog člana računa se od dana kada su direktor, zamjenik direktora, pomoćnik direktora za Kriminalističko-istražni odjel i pomoćnik direktora za Odjel za unutrašnju kontrolu preuzeli svoje dužnosti.

Članak 27.

Stupanje na snagu

Ovaj zakon stupa na snagu osmog dana od dana objavljivanja u "Službenom glasniku Bosne i Hercegovine".

PS BiH broj 39/04
04. maja 2004. godine
Sarajevo

Predsjedavajući
Predstavničkog doma
Parlamentarne skupštine BiH
Martin Raguž, s. r.

Predsjedavajući
Doma naroda
Parlamentarne skupštine BiH
Mustafa Pamuk, s. r.